



全邊略記 二上



漢書門	
九	一
一	一
六	六
二	四
四	六
冊	架
函	號
類	

內閣文庫	
九	一
一	一
六	六
二	四
四	六
冊	架
函	號
類	

內閣文庫	
番號	漢 9116
冊數	24 (3)
函號	292 136



全邊略記卷之二

淺草文庫

桐城方孔炤潛夫父輯

大同略

雁門寧武偏頭三關略在內

洪武元年秋元都既墟略收真定諸地維時元竹真踞于大同路脫列伯跼于宣德府我皆未之先也

高皇神武廟謨亟命大將軍達徐徑趨山西命偏將軍副焉調右將軍勝馮繇河南進渡河克武陟下

懷慶取澤州戮偽叅政俞仁克潞州秋九月大將軍所過擇人守其要害遣傅友德略定平定州井陘故



關降之矣。時廓擴帖木兒將出太原。進居庸而攻北平。大將軍曰。孫都督總六衛之師。足禦之。吾當乘其不備。直抵太原。傾其巢穴。所謂扼吭擣虛者也。彼若還兵。已爲吾制。進退爽策。成擒必矣。擴廓帖木兒果聞而還。其鋒甚銳。友德薛顯以敢死士數千却之。敵城西而軍。郭英憑高而望之。謂常遇春曰。多而不整。大而無備。請夜劫之。遇春然其計。謀于達曰。我步兵未集。何以能戰。精騎夜劫之。衆可亂也。衆亂將可擒也。會虜部豁鼻馬潛約來降。達大喜。夜襲之火鼓大

譟。擴廓方坐帳中。不知所爲。衆大潰。自相殺。擴廓乘驕而遁。遂克太原。得四萬人。復擊賀宗哲于石州。猗絳平陽悉平。二年正月。諸將還攻大同路。一鼓而克。平章竹真棄城走焉。追禽之。友德顧時巡太和嶺之西北。次宣德府。敗其將脫列伯。而兩邊之重障三關之沃壤。自石晉以來。淪沒腥羶者。一旦耀于大明之上。豈不赫哉。七月。元兵復攻大同。甚急。時李文忠領兵往援陝慶陽。中道聞警。乃謂副將趙庸等曰。吾與君等受命而來。闔外之事。有利於國者。專之可也。今

大同受敵。若候進止。吾恐敵愈熾。不可復制。豈不失機。衆曰諾。遂繇代出雁門關。九月師次馬邑。元邏騎數千猝至。文忠與戰。敗之。擒其將不革。擲帖木。越次白擇驛。又擒黔虜四大王。時天雨雪。文忠疑有伏。乃身引數騎入山。察觀之前軍已駐營。去敵五十里。文忠至。遽令遷之。復前進五里。阻水爲營。先遣人間行。達大同城中。方知是夜元將脫列伯果悉衆來攻。文忠令鮮食。堅壁不動。先以兩營誘敵。督人死戰。自寅至辰。度其饑疲。乃分兵爲左右翼。身當前鋒。奮擊大

破之。生擒脫列伯。降其衆萬餘。獲輜重馬匹無筭。遂進兵追孔興。至東勝州莽哥倉。不見虜而還。先是元主走屯蓋里。命脫列伯孔興以重兵攻大同。欲圖恢復。至是脫列伯被擒。孔興走綏德。其部將復斬之。來降元主。無復南意。文忠俘脫列伯至。上曰。彼亦爲其主耳。釋之。仍賜冠服。三年春。大同守禦金朝興取東勝州。獲元平章荆麟等十八人。大同守將汪興祖克武州朔州。獲元知院馬廣等六百人。元孽四大王復寇武州。鄭亨追至龍尾。獲其王脫忽的帖木兒。四

月封皇第三子。桐爲晉王。六月山西行省上言大同糧儲路遙費重。若令商人于大同倉入米一石。太原倉入米一石三斗。給長蘆淮鹽各一引。引二百觔。則轉輸之力省。軍儲之用充矣。從之。五年議征沙漠。遣大將軍達等出大同趨河林。糧不繼而疲。遂還。至嶺北與虜戰。敗績。六年傅友德大軍出鴈門。追獲平章帖木兒。李文忠出朔州擒元太尉伯顏不花。師攻大寧高州。克之。斬元宗王朶朶失里。擒承旨百家奴。師至豐州。擒胡官十二人。部衆百餘。牛羊萬計。魯王敗。

走斬之。獲其妃蒙哥及其金印。斬其司徒荅俊海等。十月上復命李文忠留山西。御奉天殿論之曰。創業之初。君臣同其艱難。及其事平。豈不欲與休息。然居安慮危。古人所慎。故嘗命卿等往西。已思遠勞。備兵。乃召卿等還。今聞胡人窺塞。事不可已。故再命卿等往。豺狼之出沒無常。保障清野。來無所獲。俟其情歸。率銳擊之。卿等老將。臨機熟矣。非朕所遙度。至邊圖上方略。使朕覽之。二十二年命晉王成祖分道伐虜。二十八年置大同中左右前後五屯衛。分東西。

二路立二邊焉。時封代王桂子大同府。上以餉遠
餽艱。加意屯種。以紓轉運。國初設衛之意。蓋恪乎其
足食也。永樂十年。山西緣邊墩守始成。先是江陰侯
高吳請于緣邊築立烟臺。從而行之。至是東路自天
城至榆林口。直抵西朔州煖會口。西路自忙牛嶺直
抵東勝路。至黃河西對岸灰溝村。墩皆成。高五丈。圍
城高丈五尺。開濠弔橋。上置水櫃。煖日盛水。寒月積
冰。墩置軍三十人。悉御畫也。洪熙初。勅大同總
兵鄭亨曰。天象有警。朕恒慮邊。今其聲跡無聞。一有

奔突。當思有以禦之。農業方興。慮妨屯種。慎之慎之。
亨等奏請。促遣高山等四衛軍詣大同屯。賜勅荅
曰。去冬所奏。已勅府部矣。卿等因循失時。而督今屯
之種。已入土。若使動移。所種盡棄。况各衛之相距亦
遠。急到亦及夏中。農時既過。彼此失業。卿等忽略之
過也。今于文職內簡一人。專理文移。如有稽緩。則罪
在彼。若軍機調遣。則任在卿。宣德四年。亨奏蔚州軍
充同城神銃手。而屬在蔚。兼給其糧費。甚請令其得
完聚。上命行在戶部書張本議之。報可。勅山西

全邊明記
都督李謙曰。和寧王阿魯台遣貢。從大同入。度必緣邊近者。韃寇百餘。犯古北。被銃擊。乃遁。探于開平。浩嶺驛無備。突入西衝。失機者已罪之。北聞崖頭舉火。恐此賊也。其益提備之。戶部題山西歲納宣大秋糧。負欠者多。請下布政司量徵土物。赴邊糴米。所司條上事宜曰。土物各察所宜。如布絹線花茶鹽農器等物。酌其值十分減其二。又宜于應朔蔚渾源二鎮常豐之處。創集場。立塌房。以召之。平陽太原澤路殷實州縣徵物貨。赴其邊。而吉隰近山。饒瘠民艱。宜存米。

糧五分。納于隣衛。總之餘丁尚多。宜從各衛勘實。督令屯田。則子粒之所收廣矣。從之。同帥亨奏。阿魯台所部人馬二千。駐集寧海子西北岸。上降旨曰。毋擅以兵逼之。如其降耶。勿覘伺致驚也。六年設保德州。守禦千戶所。准李謙條奏。訪城舊基。臨黃河。當其要衝。民甚便之。初雁門振武鎮西三衛。有帶領官軍八百五十人。至是上諭設守禦千戶所。屬之于山西都司。而以前軍數實之。時武安侯幕府治軍機文書。叅政沈固奏記。大同舊領神銃三千門。而內官郭

敬分撥柴溝東至崖頭西一十八處。凡八百餘里。力分矣。乞取回內城養銳聚勦。而邊衛之老弱當入內地之精健當出。比來侍郎柴車勘地。每頃令納細米十石。比之民糧尤重。夫士有室者月支七斗。無室者月支五斗。不令自耕。奚望足食。太宗勅諭舍餘願耕者。子粒自收。不拘頃畝。官不得比較焉。請自今減納二分。邊丁或得所養。且郡縣設有養濟之院。爲鰥寡孤獨地也。軍士壯苦老退。亦有無依者。乞令天下衛所取勘此意。上是其言。命行在議舉之。同帥亨

奏山西之來戍者。遣還備頭關。地廣脩疎矣。乞于腹裏調二衛以兼之。行在兵部議。仍于李謙撥調五百人往焉。河東缺軍。卽于本省都司調之。不及于腹也。正統初。大同新帥方政至。而虜騎千餘入掠。傷者百餘人。上宥政而逮所部鄧瑛。治其縮政。續報都督曹儉捕殺韃賊功。上曰。卿但據曹儉說耳。安有殺虜數十。不獲一馬者乎。報捷務驗其實。戒之。政又奏同邊長而軍少。乞將東勝左右鎮朔定邊四衛調守之。廷議以四衛自永樂間。安布永平諸路已久。難移

矣。止于偏頭。遼千名益之。政又奏賊掠車房口。千戶葉林酣戰而死。丘昂李政鄧昇縮不前。賊又掠黃牛。陂石亨擊敗之。獲馬鎧甲矢衣裘等物。上責之曰。爾素不嚴。致寇挫敗。支吾掩過。其丘昂李政卽梟以狗。鄧昇等與杖百編伍。葉林議其功。初寧夏總兵史昭遠送來降達虜脫罕沙言。阿台王子被甘州大軍所逐。欲往尋朶兒只伯將犯邊矣。上封其疏。示山西李謙。謙乞降榜招之。如不附則從而勦之。上命行在部移文。謹守四陲。正也。榜招之與機勦。俱非良

策。初戶部議兵之赴征者。行口二糧。俱于月糧作數。至是方政奏曰。兵力勁強。惟在飽煖。同軍自洪永俱若爾矣。今月樽之于月中。致失人心。乃從舊例給之。宣大巡撫李儀奏東路乞遣副總羅文哨之。陽和高山天城等聽焉。西路乞遣叅將陳斌哨之。同左右雲川玉朔等聽焉。同北關頭猫莊。責之大帥政之孫智哨之。三年奏設馬市。自同撫盧睿始也。遠人駝馬平價交易。遣官李原等通其譯語。惟禁漏兵器銅鐵耳。具奏報可。山西安東衛百戶周諒上言。故東勝州廢

城西瀕黃河東接大同南抵偏頭關北連太山榆陽等口其中有赤兒山東西坦平二百餘里其外連亘官山等實胡虜出沒往來必經之地臣愚以爲若屯軍此城則大同右衛淨水坪偏頭水泉四處營堡皆在其內每遇冬月就命將統四處守備官軍於此劄禦待春乃回既不重勞軍馬又不虛費糧儲非惟藉以捍蔽太原大同而延安綏德亦得以保障矣事下兵部請勅大同總兵等官陳懷等議以聞從之五年太原左衛同知陳勝奏偏關地勢險阻量減戍卒

以省轉輸部議于近關之衛精選五千人更番操備餘復屯守遇河水合仍增五百俟凍開乃撤上勅都督謙曰朕卽位以來惟欲軍民各得其所存其精銳不恤餽饟之難爾其會計之同將石亨奏臣奉督屯之勅然同右諸堡坐在極邊耕獲方興保障散渙忙牛嶺外有玉林故城去衛五十里與東勝單于城相接其地險可據也水草便利乞立烽築墩擇故城一隅而壘之旣以防屯亦以壯圍從之八年大同官巡警至沙溝風雪驟至裂膚斷指者二百餘人九年

全邊略記
同總兵朱冕奏報本邊額二萬四千六百人。天城等六備所餘東西二路四千。石亨領之。一旦奔突。謂策分何而隊尤單矣。行都司屯田二千四百。皆同所調也。請還回。更于河南備操內選一千五百助爲馬隊。庶幾軍威少振。部議曰。可。十二年宣大撫羅亨信奏。達賊也。先自去年擄兀良哈已得志。累窺我邊。乞留山西河南下班之操軍爲二路備。上曰。然。其還已遠者。姑勿追。叅將石亨奏也。先併吞諸部。其勢日熾。宜亟別隊整伍。孰可正孰可奇。孰可守孰可戰。兵知

將意。將識士情。爲上策。上卽勅通行。拔驍。毋阻軍法。武進伯冕。朱侍郎沈固上六議。大約遣諜。審禾燬草。收堡。擡營。結陣。夜劫。設伏。擊惰。而其要著。分兵爲首撥。次撥焉。步隊火車已完。三百八十六輛。乞以歇班之軍造之。每隊造車三輛。期完八百五十輛之數。上善其策。驍騎右衛千戶馬青奉使瓦刺。以脫脫不花及太師也先使臣皮兒馬黑麻等二千一百四十九人來貢。命宴之于大同。發幣表裏一萬三千三百四十五端。給其賞。索犯邊之寇也。先付以二人。

于青。乃又誘哈密使臣脫脫卜花同撒馬兒罕三百三十人自陝入貢。如例宴之。公私騷擾。邊患益深。是時太監王振擅權。狼恣愈甚。災異叠見。盜賊滋起也。先進馬以二千人詐爲三千。振汰滅之。遂絕和而爲寇。振且以軍略自雄矣。十四年也。先大舉入大同。王振獨持車駕親征之策。以十四年八月十五日宣府土木嶺之變。上北狩焉。二十三日虜擁上至大同城下。索金幣約賂。至卽歸。駕都督郭登閉門不納。上傳旨曰。朕與登有姻媿。何外朕若此。登遣

人傳奏曰。臣奉命守城。不敢擅啓閉。隨侍校尉袁彬以頭觸門大呼。于是廣寧伯安劉等括公私金銀共萬餘兩出迎。駕旣獻虜笑不應。竟擁駕去。初虜來索賂。郭登曰。虜給我耳。莫若以計伐其謀。劫其營奪。駕入城。此爲上策。乃謀以壯士七十餘人餉之。食令奮前執其弓矢。因擁駕還。召壯士與之盟。激以忠義。約事成。高爵厚賞。士皆奮躍用命。已書券給之。會有阻者。旣淹久。虜驚擾而去。兵部議科臣劉斌之奏。請京兵以備邊也。紫荆原七千。近增五千。居庸

原九千近增一萬武清侯亨石促之雁門調振武諸軍指揮石彪更領馬軍三千哨之景泰元年春虜入朔州大同總兵郭登敗之詔封登定襄伯虜自屢勝以來出入自繇未聞有出一兵拒之者登不勝憤晝夜拊循將士定爲賞格期必殺賊忽報東驛賊入境登率兵躡之行七十里至水頭日已暮休兵以覘之夜漏下二鼓報云二十里東西沙窩賊營十二皆自朔州掠而回者登召將士問計或言賊衆我寡莫若全軍而返爲善登曰我軍去城已百里若一退避

人馬疲倦賊以餓騎來追雖欲自全得乎卽按劍起曰敢言退者斬斬捕虜二百餘騎奪回被擄人口牛馬弓刀器械以萬計捷聞賜勅褒美是役也登以八百騎破虜衆數千自虜入寇以來此爲戰功第一登爲將智勇善撫士卒紀律嚴明料敵制勝動合機宜在大同與賊相拒一年大小數十戰未嘗挫衄常恨馬少步卒追賊不及乃以已意設爲攬地龍飛天網等法鑿爲深塹覆以土木人馬通行如履實地賊入圍中令人發其機自相擊撞頃刻十餘里皆陷又

用砲石擊賊。一發五百餘步。每人馬死者數十。賊以爲神云。大同參將許貴言虜請和。乞荅使緩兵。下兵部議。尚書于謙議曰。曩遣都指揮季鐸指揮岳謙往使財賂方入。穹廬虜騎已至關口。繼遣少卿王榮通政王復又往。不得要領而還。今日之事。理與勢皆不可。和何者。中國與寇虜。有不共戴天之讎。和則背君父而違大義。此理不可和也。醜虜貪而多詐。萬一和議既行。而彼有無厭之求。非分之請。從之則不可違。之則速變。此勢不可和也。移文詰責許貴。勅石亨

楊洪哨于宣大之間。洪上言。二邊宜增六萬。而糧草積于代州。宜從雁門北廣武站西安驛轉輸之。都御史羅通奏也。先俱往寧夏犯邊。可以精兵八萬。從大同出其不意。擣其巢老營。可一鼓而得也。廷議賊雖營于斷頭山。而虜回者云也。先未之西也。若以重兵深入。挫抑軍威。愈長賊志。似應相機。上曰。石亨其從左監彭以得出雁門。楊能其從太監裴當出居庸。各巡邊殺賊。亨乃奏請五軍營內撥三萬。神統五千。火藥稱是。乞副將過興范廣往焉。通州撥萬人車

五千運草以從潞府具鐵萬觔鑄蒺藜設險也。兵書謙奏。今亨往邊防衛。種田護草。同軍數少。宜如亨議。募調務足。三萬。每十人立小甲。每五十人立總甲。百人爲百長。千人爲千長。俱與冠帶有功者累優之。甲長升冠帶。總旗百長升所鎮撫。千長授百戶。餘丁功升冠帶。小旗舍人亦升所撫。亨報虜穴于斷頭。去寧夏不遠矣。請于洮民土軍覘之。輕騎可搗也。山西布政原募義勇。請撥于同。勅尚書石璞往。同撫朱鑑再募之。四月賊來同。總兵登伏截之而去。山西撫朱

鑑定策應之略。曰。河曲保德岢嵐興嵐宜令偏頭關策應。寧化靜樂興州定襄太原清源交城文水宜令山西策應。五臺繁峙宜令雁門策應。石州寧鄉宜行汾州協之時。達賊分道犯河曲義井而隣。隘不援。大同知府霍瑄奏。販夫農父苦于剽掠。已極。願避于腹裏。輒城事下中丞沈固。發廩賑貸之。亨到同。見同民之牛具被掠者。將脚力中驢四千二百餘頭。給爲耕資。而勘各衛正軍。貼餘丁之房室。其餘老幼男婦。回于籍。然而胡馬絡繹。臨圍卽散。馳驟難追。惟有奏聞

而已。鑑又奏乞大同之分番者。畱守雁門。而大帥登
爭之。曰。洪永承平。其調且然矣。近賊雖問犯岢嵐。比
入輒出。豈非懼我雲中。抄其歸路。而不敢久乎。乞仍
更番爲便。從之。八月。上皇車駕繇寧路還京。于是
兵書謙奏賊稍退。道頗通。請宣大急儲事焉。都御羅
通乃酌時宜。借四州之民壯。代大同糧。一次事畢。歸
農。上允其請。蓋澤潞平定汾四州民壯。操守九千
五百餘人。皆腹裏虛餽。而近邊軍旅。疲于輓飛。誠公
私之利也。通又奏懷仁渾源朔州。已撥于太原倉運。

萬石給之矣。軍中糧足。則以本折間施兵民。兩益從
之。兵書謙奏和議不可恃。戰守不可忘。宣大年來空
虛。宜遣罪囚及腹衛之赴獨石龍門。鷓鴣者。近司農
奏准河南運八萬石。山西運十萬石。猶未至。請于五
軍營中撥四萬人。運一萬石于宣府。或內府頒四萬
金。令宣大給于軍屯之無牛者。紫倒之暨白羊李河
聞和撤備。真保之城。發遣幾何。附近幾何。遠者可發
矣。上亟賜行。天順二年。總兵官高陽伯文李等議
大同草場逼窄。採取不敷。止令軍自今。軍自備草三

月各衛所軍餘採運及蓄積草。又給三月。則新草已及用矣。上報允。吏尚李賢奏秋防計。上勅副都王宇行邊。賢又言邊墩雖設。寇來不能守者。無制故也。右通政劉文備知此。於是命文往視。文設懸樓礮木塌窖。賺坑守者賴焉。三年。總兵官石彪塘報安邊營之捷。彰武伯信楊僉都徐瑄督僉周賢都揮李鑑等。斬平章鬼赤力。追于昌平境。生擒四十七。斬首五百餘級。奪騾馬牛羊二萬。周賢李鑑死于陣。上嘉之。賚卹有差。太監陳瑄以京軍馬隊巡邊乞賞。上

戒之曰。賞不在京軍而在邊軍。邊軍誠艱苦。爾何曲為說。其戒邊將妄言希賞者。十二月。石彪家丁劉三逃于虜。亭來領其偽職。來謀于偏頭。獲之。云賊來以黃餅衣針為信。累石塔為號焉。上以誌飭太監王春等。竝各邊如之。五年。平虜城守備孫廣許顯等追賊境外。遇伏發而歿。山西都督王信奏虜知偏頭同右有備。輒從煖會而入。知朔州有備。乃從橐蓮臺而入。直抵太原。岢興靜樂被其剽掠。然雁門外廣武站孤城無水。不攻而自破。謂宜築蓮臺城。而調其軍戍

于此則太原一帶無虜繹之患。都御王越條便宜。草束將盡權。改納米冠帶之軍民舍餘。及雜犯應贖者。悉令納草。成化三年。都御葉盛奏。凡虜中走回男子。例送御馬監。驗充勇士。不堪者發其籍。所司不憐惜之。致生悔心。復入虜中爲孽。間有挾馬來者。復入公。負累所軍。今當下令。聽其自售馬。而仍免其雜徭。則聞風感慕矣。詔書載年八十以上者。所司每歲給與絹米酒肉九十者。給冠帶。此曠古之盛典。獨軍衛之高年未蒙偏及。上曰。王政優高年。奚有軍民之

間。中國人不幸陷虜中。既而來歸。情義可喜。所司其詳之。四年。宣大巡撫王越言。大同陽和天城宣府獨石等八城堡。俱險隘難行。畜牧鮮少。虜所希至。惟同之中路。猫莊西路。煖會兔毛。宣之野狐。全右平曠。易寇每至而軍弱不支。輒分彼此。坐視成敗。不相救。自今凡遇小寇。徑勦。大寇會攻。兵勢乃盛。而事機易合。于是部嚴互援之律。六年。兵部言。此虜久掠延綏。忽復東驚。慮我邀遮。預覘虛實耳。不然是知大同遊兵西往。欲乘虛肆掠。且三邊士馬精強。大同爲首總。

師統有六萬之衆。未聞奏一矢之捷。撫機不發。安得成功。已諭令楊信等戮力同心。期於敵愾。乘疲襲險。惟便是固。但毋輕卒寡謀。虛聲塞責。仍先具方略以聞。上曰。邊將以禦敵爲務。謀定而戰。庶無遺策。同撫王越奏。延綏二路。係虜所出沒。比令許寧出西路。龍州。范瑾出東路。神木。越與太監秦剛據榆林而應。兩路瑾遇寇于崖窰。敗之。寧禦之黎澗。轉戰三十皆捷。而叅將神英亦敗之于鎮羗。共斬首四十餘級。甲仗馬中羊九百數。事聞。獎焉。越引兵還偏頭。部責其

不待延寇息而擅回。得旨。仍任屯宿于有芻之所。總兵信副督徐恕。叅將張瑛。奏胡柴溝之捷。分三營以掩襲之。轉戰感虜。前後斬首九十餘級。甲馬弓矢具數四千。捷至。降獎焉。七年。兵侍陳宜巡邊。復曰。偏頭東北四堡。乃通援會。近賊窺之。捌楞老營。滑石黃河七堡。尤近賊境。得馬營。焦義城。唐家堡。黃甫川。悉皆防。力單弱。何繇強禦。宜于雁寧。舍餘。摘撥千人。分戍。而赴班之。不刻期。則版築不給。倉草之被豪猾者。六七十萬。良繇巡官。經年不履其地。景泰來樽節邊。

儲草既停關。豆亦減少。馬失預飼之方矣。遇勦撥芻。住不彌月。或值寒期。蕭然莫採。是以軍多棄馬而逃。則冬春之交。支草日三十束。豆月一石。當如故時。各路戰馬以征西死傷者多。巡撫林聰奏就彼募之。凡舍餘納馬五者。給冠帶。價以千金爲準。聰又奏衛地希濶。每警至而住牧者無所于避。蒲州營之接威遠。碾子頭之接旱井。酸刺林之接朔州。各于其中。連築三堡。聲援密矣。宣大操舍編伍而止。其上班時應加月糧一石。使樂于效用。倉芻山積。宜專委副使董之。

皆部覆得可。僉事賈俊奏事。虜衆一據河套。一據東勝。河冰一凍。似有合勢。恐三關不教之衆難以當之。乞遣一大將假之重權。部議山西撫院雷復。冬至兼督三關。至春仍理撫事。從之。十年兵侍滕昭言。比者朶顏使臣傳報滿都魯孛羅忽西行進川。而的加蘭思則往東勝境上。頃太監覃璣偏頭關戴廣所奏略同。醜引互屯。而巢于河套。皆所當備。上通勅之。刑侍杜銘巡邊既還。而籍其數。偏頭軍壯九千三百八十四人。馬三千二百七十八匹。墩臺四十三處。代州

軍壯四千八百八十四人。馬一千五匹。雁門軍壯一千五百三十八人。馬三百九十匹。石墻二十一處。寧武軍壯一千四十三人。馬七百四十七匹。墩築四處。保德河曲要區也。非專設兵備。不足以理其繁。十四年都御秦紘言。築防必因山爲壘。則力少而功多。欲自偏頭長林起。南至寧武羊房口。二百里內。其限以大山者。勿論。其川口寬平。岡阜大衍者。計周六千一月可辦。第將三關退班。竝代崞太原。住種兼修。賴之永矣。從之。十六年北虜入大同。命太監汪直監督軍

務。保國公永

朱

威寧伯越

王

太監傅德往擊之。其時

虜從威遠入。卽日都督范瑾率朱檻孫鉞六千人。而副都孫洪亦領四千合截之矣。直之出。益以擾也。直乃設山西平虜一衛。以控老營奶河諸堡之要。復往宣府擊虜矣。直復請邊需而得之。齎大同五萬金。又賞都督白瑜等絹七百布一千四百餘。是時虜自威寧被劫之後。犯執前讎。賞賜諂度。略無虛日。而邊吏每坐失機者。亦接踵云。十八年巡撫何喬新奏。山西所屬稅糧計二百二十七萬三千一百六十七石。洪

永間除所存畱則輸大同雁備二關而已。正統末有事于北伐。乃以太原澤潞等所入輸之宣府。成化初有事于套伐。乃以各屬輸之榆林。自此畱數少矣。豐稔僅僅足支。而荒凶多無徵之額。宗祿無給。內倉何派。追其餘糧。因口以甚。况猝遇師旅。倉廩如懸。竊見宣糧原取之山東畿輔。榆糧舊取之陝中。乞勅如舊。乞宣榆之供。令瘠瘵少甦也。山西所屬額軍六萬一千二十名。實則三萬七百五十三名耳。其間操守于大同矣。疲弱已極。國初以來。西民編戍南方。非其

土性。多致死亡。諸衛清勾。徒有分擾。乞自今所清解南之戍。如雲貴廣湖江浙各衛者。俱畱本地補其缺伍。而原衛則豁之。比年逋逃紛紛。而山西爲甚。姑舉一二槩之。如平陽稷山縣額地四千五百八十餘頃。歲輸三萬七千石。洪武間履畝增科。益以三千。皆溝澗沙灘之所覈也。又如寧鄉縣山深上瘠。逃絕戶丁千六百有奇。乃派徵一萬。于見存里甲中。今宜如例折之。每石三錢。每束草二分。發邊就糴。庶幾流亡自歸。田野自闢。夫古之葬者。必擇不毛之土。今親王以

下奪據民間腴地築垣而侵其步利歸藩府稅存細民則催科宜恤吉擇宜限也鹽池所轄戶一萬七千五百餘丁歲課三十萬四千引歲春鹽花生結則鹽丁下池取之課足即止季春以後自凝自化置之無用乞令刑司將徒流以下採取餘鹽供給邊用奏入詔副所司十九年總兵許寧奏小王子率三萬寇邊事下兵書張鵬議遣太監金輔新寧伯祐譚遊擊馬俊往與虜遇于毛家皂張鉞楊彪已與戰于灰河虜復圍劉江王榮于竇家坊莊鑑及少監陸閻復邀

之連戰二日斬首一十七級我軍則陣亡五百八十六人上嘉其以寡敵衆也而不知兵敗失機更以捷聞復命保國公永朱太監蔡新都御史郭鏜發步軍一萬馳之八月周玉報虜復至上命太監簡顯都御史秦紘叅將白全先後發兵五千以赴仍勅侍郎李衍何喬新歷關焉山西撫邊鏞報虜深入渾源朔州標掠而雁門請益兵于是部議京營竝緩兵所赴大同幾四萬請令朱永倍宣道往擊之烟火徹于紫荆真保馬窟賴鏞極力捍禦晝夜不息大同

帥許寧報參將劉寧遇虜于聚落站。寧等分邀于水峪村。戰于紅牆兒。左監石巖追之于大溝口。董昇遇之于沙窩村。宋澄遇之厚子口。莊鑑遇之于牛心山。凡七戰。得首級一十九。朱永報周玉繩律。敗虜于葦子溝。取十級。朱謙等伏柳河。衝于雙望。取十二級。命賞奏捷者鈔貫。永乃奏築野口。宣寧四方澗。石佛寺六堡。赴召還京。撫邊鑪奏記。大同宿重兵。而雁門虛匱。前者虜直抵雁。臣以死拒。僅其輕騎耳。若全營一鼓而南。何以禦之。可于代州建牙置大帥便。

上曰。將得其人。雖一旅足爲長城。非其人。雖重兵不爲鎖鑰。其如部策已之二十年。兵書張鵬論春防事。令都督馮昇。楊玉按伏于雁朔間。而馬俊白全聽其節制。上命太監張善督軍。定西侯琬蔣佩大將軍印。內官太監宋祥監鎗。往備禦之。總督宣大尚書余子俊奏。頃臣撫延綏。常議削山築城建墩。今十餘年。民被其利。請以行之。二邊焉。大同中路起。西至偏頭。六百餘里。每二里築一墩。濶方三丈。高亦如之。對角作二懸樓。方徑六尺。兩墩相去空內挑濠。塹廣丈五。

尺深一丈每墩役丁五百人十日可成。度今夏暑虜馬瘦矣。兩月之暇可築二十墩。墩令十人守之。瞭而兼擊。如兩墩共擊一空。則四百步之間。砲力無遠不及矣。宣大倉場積弊如故。且如遼東餽餉。奸蠹二百餘萬。爲貨權資。遂至告急。似宜設按察二員。專之。其他如借京軍乞鐵硫。告折糧。俱得所請。然其時荒旱米貴。大工驟興。人頗難之。子俊更奏大同平曠必資馬軍。今本邊二萬七千九百。而延寧靖固共三萬七千九百。俱以黃河爲限。春暖凍開。尚堪借調從之。

上以去年大同失機。執都督許寧。巡撫許鐘。內官蔡新。俱下獄。會訊于午門前。獄具得旨。寧等邊託重受輕。進折軍。致虜肆無忌憚。情犯深重。本當論死。姑從輕發。寧鐘降六。新降三。初寧與威寧伯越王之互調也。越謂郭鐘曰。許寧守已。撫下。雖輕戰陣。非統馭才也。朝廷重任之。其必債公。慎待之。寧至大同。與汪中貴爭坐忤焉。警至而中貴納衆言。欲出兵于邊。按伏。而大將重屯。以遏其衝。鐘曰。虜至矣。公當申明號令。以一羣志。寧曰。兵無常勢。人自爲戰。安可預圖。

鏜乃奏直寧失和奏調中貴直于南京蓋將習之吳
輒也歛兵守陴間伺虜入掠勢分各擊掩其情此邀
功之故智也時小王子大至烽日夜不絕寧乃踵故
智遣劉寧董昇屯于山西周璽屯于懷仁而大帥堅
壁居中間虜懲往年之敗未輒深入及覘知寧所布
列若此遂突入而代王之莊先被害寧殊無意出軍
門卒報較尉至矣寧不得已乃與新鏜分三哨軍于
二里許虜則伏精騎于禾稼深處而數騎辭鞍牧馬
以誘之新麾下見之果馳掩捕寧麾下亦見之曰勿

令太監功也遂不自禁虜騎四合死者千餘寧奔夏
米莊新鏜馳疾入城虜乃圍昇寧幾不脫乃發大炮
名大將軍者竟落王子帳前人馬辟易死者枕藉遂
引去而莊鑑抄其零虜爲捷云大帥自米莊還城而
陣亡之家其婦人擲瓦詬呼于道萎薊喪氣矣時臺
省亦無刺其謬者尚祖寧以爲街亭之失而汪直適
調得免于禍余子俊奏偏關之東地名井坪北至虜
南至朔州于此設千戶所聲連勢絡而乃阿老營等
亦藉援矣其西路新墩俱不如法合治總兵周玉太

監孫振巡撫秦紘等罪。上宥之。子俊奏小王子已遠遁。其大將軍佩印琬蔣等請班師。李杲郭鏞劉清所護軍。其以時罷遣之。莫若就順聖等地土沃饒。兼有鹽利。遊民無筭。舊用正軍三千三百餘人屯種公田。獲不償費。項以選壯丁易之。數已滿千。宜設叅戎領之。就以罷遣京軍之甲冑弓矢給其用。仍覈正軍之舊屯者。卽令編戶代種。如例稅。而鹽場量稅以銷竊據之奸。詔曰。可。子俊以班師之後。恐賊間也。令劉寧備于朔。滕瑾備于偏。董昇備于威。遠馬俊備于

同右。餘則本堡操候之。同延之界。正對豐州。虜所牧地。請陞郝志義兵備于寧。雁而郭瑄守代。王昇守偏。上曰。俊言是也。子俊復奏邊牆之役。適歲歉而止。今隨方經略。度定地基。東起四海冶。西抵黃河境。長一千三百二十里。舊有墩一百七十座。應增四百四十座。宣分三百六十九座。宜甃以石。同分一百五十四座。偏關一十七座。宜築以土。工人八萬人。月糧六斗。銀三錢。鹽一觔。共糧十五萬四千八百石。銀七萬七千四百兩。鹽二十五萬八千觔。馬六萬三千匹。束

全通明言
芻八萬五千五十石。實一勞永逸之功也。然子俊以築墩責成于邊臣。以閱實副任于臺省。但計筭成數。言之可聽。而行之惟艱。且自欲還京。是後怨恫之來。蓋亦不近人情云。雖然。非常之原。黎民駭焉。子俊舊告成于延綏。其權獨也。今諠譁于宣大。其任分也。戶部奏。子俊連歲所費百萬餘金。料糧三百五十萬餘石。又開中淮鹽六十五萬五千餘引。較之往年。事倍矣。乞遣官勘實。乃命侍郎杜謙。給事吳道寧。御史鄧庠往焉。山西都御葉淇奏。平虜井坪同城之北。先

因余子俊議募屯徵輸。其地新闢。沙礮寒苦。必須安撫。方固其屯。今同城北。畝可歲徵黃米一石。折色三錢。平虜畝。歲徵糧一石。折色二錢。近償馬之令。下于各軍。尚八萬金。其情可矜。乞卽以畝折充之。爲便。上曰。是。先是。諜報威寧海西。虜營萬許。脫靴城南。虜騎掃路七千餘步。大灰結壘。徑五十里。勢將入寇。弘治元年。小王子番字貢書。辭甚謾。自稱大元大可汗。兵書馬文升集。廷議之。英國公懋^張等曰。夷狄者。聲教所不加。其僭稱名號。犬羊故態。中國何預焉。辭

雖驕倨。然自古禦夷。來則不拒。在我先朝。亦累賜包容。宜降勅大同守臣。宣其酋長。果誠心入獻耶。則具名數上請。而酬之如故事。若觀望不來。仍嚴我備。從之。舊例衛軍每七八月間。人採草六十束。輸之于官。今時當採青。而虜貢載途。各軍以分防。誤輸。都御許進請蠲之。戶部議蠲其半。其當輸之半。每束折色二分五釐。吁。此軍之所以剝也。進又奏。邊人自虜中帶馬者。其馬解京。而有司撥贓罰償之。今邊方急于用馬。請以他貯朋合買之。以解。吁。此先年葉都憲所

條蠲者也。復踵不革。何哉。余子俊上防邊奏記。曰。舊例同宣。在城各立司分。每司官軍五百。設把總一員。中軍設管總官一員。其旗牌掌於總兵。遇有調遣。聽其號令。所以事歸于一也。成化以來。因於同城。并各衛沿邊。選取遊兵奇兵。以聽延綏之調。故宣府太監總兵等官。亦各自爲營務。選精銳。各領旗牌。名曰太監營。總兵營。副總營。遊擊營。監鎗營。營兵既分。各官視爲私屬。役占無藝。其有違犯。互爲掩匿。而各路所遣。非老卽弱。以致有警不能禦之矣。請令鎮總等官

以所分營并所選精銳補在城遊兵奇兵各路極邊遊奇二兵不得擅動仍合諸營分司總理庶兵政有統而兩體不分耳大同守總兵副總兵遊擊將軍所治者爲中路陽和天城爲東路南乃宣府洪州也大同左右衛平虜威遠朔州衛井坪堡爲西路西南乃偏關也各有叅將一員分守如常山蛇首尾相應但從來策應未有定法今請著令如虜寇中路則以大同城中爲主兵而調東路與洪州合兵應於東調西路與偏關合兵應於西寇東路則以東路爲主兵而

大同副總遊擊及宣府遊洪州叅各合兵於東西策應之寇西路則以西路爲主兵而大同副遊及偏關叅將合兵亦如之其應州渾源山陰馬邑懷仁五城官軍則或於本城或於要害城堡分兵邀擊如少小寇盜則大同遊與各路各以兵應之但洪州隸宣節制而偏關非同所屬請令二路將皆聽大同遇警調用從之三年虜將入寇守臣以聞上命新寧伯祐譚選馬軍萬二千練習以待守臣言同之急也常調延綏遊兵策之然待奏後行緩不及矣上曰延與

全邊略記
同接境互援。果有急。先調後奏。可也。其預勅之總兵官王璽。請告急者。調偏頭之精銳。應于西路。太監劉政。執之以爲不可。部覆近議。調綏復調宣矣。備其勿他。調以自虛。國初洪州順聖之地。撥民承種矣。其後改爲御馬監草場。天順末。乃并餘田。盡給軍民佃種。人二頃五十畝。納糧五石。草十束。成化末。余子俊增其數。至九石五斗。然徒具虛數而已。六年。撫侯恂請如舊。以甦下。報可。十年。虜入同境。連營三十里。命平江伯銳陳充總兵官。太監楊穆爲監督。選精兵萬人。

馱馬五千。待報啓行。仍選團營馬步二萬以備。因兵給事楊英所請。特命戶侍劉大夏。韓文。兵侍李介。王宗彛。各往經畫之。從征官軍各預糧三月。布一疋。以贍之。李介奏。大同往時。外有大邊。內有小邊。設險嚴密。保障易爲。歲久頽圯。守臣不能修。東自宣界。西至偏關。其間舊牆尚堅者百五十餘里。今葺者半之。改者倍之。并斬崖濬濠。增墩益堡。大約五百里。用卒四萬人。及今年稔。圍靜取工。于本邊。每年兩月之役。不當興師萬之一。從之。介又奏。其一便。調集以節遠。

戊也。偏關舊有舊兵。留大同城防矣。延綏去千里。赴調偏關亦已足。莫若分選三關得三千人。特立遊擊領之。其一收遠軍以實伍情也。北人戍南。率斃于瘴癘。南人戍北。多困于冰寒。莫若太原一帶。所清南丁。卽編本伍。其一班軍名絳。實縮到失其時。宜嚴分。巡原領之責。其一軍職買馬。坐住俸鈔。因于啼號。宜有以寬之。其一占役之多。宜設其例也。從之。兵部奏事曰。正統十四年也。先犯順大同。幾于不守。成化十九年。小王子復讎。大同遭其摧剝。景泰之初。設巡撫也。

假以重權。振揚威武。而日以怠忽。若乃邊儲舊納本色。近年減折而收之。復短折而支之。軍士怨嗟。罔肯用命。李介閱實無馬者萬餘。守臣匿不開列。今春虜貢在關。而守臣縱令勢家用違禁之鐵器。易彼達馬。墮其奸詭。因肆侮焉。卽今數犯遼永。莫不有因。雲南思六復占麓川。兩廣獐狃。大思猖獗。良繇巡撫憲臣多與守臣大帥黨比。不規其過也。有旨邊糧折放重輕。戶部詳議以聞。于是斬山西大同前衛指揮劉桂梟首于邊。以其私賣軍器于夷人也。給事中吳世

忠奏各邊墩率三四里而大同隔十四五里各邊墩去城率四五十里而大同遠至一百八九十里烽火不通形勢不及如此也將官推舉多以賄通一握兵權如獲私寶既求償債又欲肥家役軍多至千人侵屯動以萬計掊剋賞賜以賂權貴如此也十月風霜士甲無補妻居無煤幼兒裸體問其故則曰役繁糧薄苦于奉將扣筭日巧馬價爲累或過時不關或未夏先止馬死日多軍補愈困如此也械器無數下班私交點闡無人傳借多朽如此也司餉者每石剋二

錢以待他用哀一錢以防補馬米賤則閉錢與米錢賤則閉米與錢如此也總兵神英巡撫劉瓛守臣孫振貪和畏威縱虜交易鍋鋏箭鏃悉入虜囊既掠蔚州劉淮領兵不進計其按伏所費此二十日費至二千八百金未聞宿飽徒聽長驅凡斯前弊痛革已晚掣腹裡諸衛之間卒以爲兵耕近疆之空地以爲食又于歲豐之後展築大邊履其畝而糗其餘陛下可安枕而卧從之都督王璽謀報虜約四營復宣之役請選伍以聽部覆之曰北虜往歲逾春每牧于臚

胸河今出套卽潛于東勝。譎之甚也。况脫羅干之子。火飾梟鷲尤倍之。命太監楊穆平江伯銳。陳操候焉。先是大同開市易馬。大帥神英宋澄馬儀裨將趙景李璵秦太奉御侯能遊擊劉淮悉令家人以段布易之。而英景家人雜以違禁物。虜欲引境外衆入于館。乃私遺李敬一馬。爲請于守臣而許之。曰虜衆疾相染乞暫休于館。于是橫縱出入爲患。驢馬入邊內。商民多以鐵貨交易。捍文罔矣。虜盡得要害。而景等率奇兵三千護之。未出境而返。虜遂合勢圍蔚州。烽

燧百里。英等復不爲意。馬營遂陷。邊人喧然。大吏帥賤禁噐而貴狄騎。英景以隙于爭市間。訐聞長安。遣給事吳世忠轉按之。具得狀。景家人趙晟劉玘等所爲端。而冒禁坐賄。及逗遛棄師甚悉。而太監孫振都御史劉瓛不爲防。有旨晟玘斬。趙從神十戍邊。英閑住。瓛振外用。淮敬下巡按逮。問論死。後以赦宥之。十三年虜衆犯同左衛。七日遊擊張俊禦之東荆莊。先之以三百徑趨城南。復分三百以應之。面被箭益奮。虜不能克。退駐河之北。巡撫洪漢劾馬昇許鑒葉

椿秦恭王杲白玉王璽太監劉雲蔡恩侯能韋忠等并自劾。上嘉張俊而責璽等戴罪殺賊大學士健劉言命將出師未聞出奇制勝諸將懦怯不足依仗。上乃責銳。陳主將重權苟非其材雖麾下謀勇皆不敢效留之恐誤邊。召太監金輔平江伯銳。陳還。命太監扶安保國公暉。朱挂印往焉。兵書馬文升奏平江伯銳兵侍郎許進之領軍也。與其指日克平以紓北顧。經今月餘虜勢益熾憂莫大矣。本部奏准潮河一帶。命之都督李澄居庸一帶。命之都督

張晟紫荆一帶。命之襄城伯郎。李天壽黃花一帶。命之侍郎王宗彛分防經略不審先年蔚州叅戎已設復裁計蔚渾迤南俱有嶺峻得防豈憂虜耶宜增如故紀功御史邊憲奏威遠失利之後守將不能支乃請京兵以雪往恥如何京屯日久而醜夷日張銳等生長膏梁託閉門于堅壁遮按伏于孱羸互相觀望納侮損威通乞重重正典刑輕加削奪于是臺省交章羊圈之賊五十騎耳劉寧以萬騎襲之寸功無獲而死者十有三人車關零賊數騎耳銳遣五百而

職。雲等九人下。巡按逮治。虜再入大同南掠。副總兵姚信將軍李廣李祥蔡瑁各閉城自守。賊得利而去。時大帥張俊太監陸閏都御史劉宇俱被劾。得旨命各戴罪殺賊。蓋緣中貴制行間久矣。失律之誅互相行媚而未減。無何復膺節鉞。雖以鈞陽爲之本兵。而司敗之罰掣于私竇甚矣。勅法貴武哉。十四年巡撫史琳請益軍。上命太監苗達總兵官朱暉領馬步隊一萬以征。西撫魏紳奏偏關暨于寧武當增築大邊。設墩增守。同撫劉宇亦奏興軍五萬修築大邊。

而黃門許天錫駁之曰。同圍泰然。墻未甚懷。尚期三年報工。今重困之餘。傾城就役。疲于版築。焉能辦賊哉。乞分路踐工。而撥之以次。適御史王獻臣亦上邊計曰。威遠失利。士無戰心。修築大邊。沙石踈燥。荷糧而往。氣已銷竭。豈勝畚鍤之勞。萬有猝虜。何以禦之。大役乞且停止。姚信陳廣戴罪自効矣。乃過于削軍。招怨入骨。乞同馬昇之喪師。竝行誅戮。同綏土著素稱勇敢。雖招之而不附者。處置失宜故也。乞示沿邊任彼父兄子弟。親朋隣里。自相爲伍。官爲給械。各隨

所能用之。祈名則陞。祈利則賞。願併功一人者聽。庶
可得其死力。馬疲則軍弱者。其價既輕。商無厚實。加
以羈難。雖有良馬。亦不至矣。何不併兩馬。充一馬之
費。期以得良為準。倉塲已設。官又置判。立法最善。近
多耄年納粟之輩。無異吏胥盜賣。冒出為奸。乞簡才
能者。授以郡丞之職。各下所司。大同諜報。河套賊于
西岸採木。大治籩筏。將渡河而東。請掣回遊奇兵之
在延綏者。下兵部議。火篩常厚。獲于大同。而今春為
延兵所制。不得逞。其造筏東渡。所傳匪妄。但欲布軍

沿河。似乎輕發。請再探之。同撫劉宇奏四事。自王杲
等之緩斬也。猶曰與其進而必死。不若退而自保。或
幸免也。當虜大掠時。廣靈縣民王景林等發憤聚眾。
持梃斫級者五已。而賣級事覺。乃問戍軍。又當大掠
時。指揮尉景徐俊按伏白狐。景俊先馳五十騎搏戰。
甚力。餘騎悉駐坡上。熟視不救。而景俊身被重創。復
嬰失機坐死。而餘騎止答三十將。以王杲為口實。民
以王景林為戒。車習為畏。懦日操。何益。是以姚信陳
廣領二萬人。皆閉門西路。而延綏所調半年之上略。

無寸功。不過尾虜佯追。虛勞士馬。不展姑息之政。而安攘之策何繇矣。請除賣功之例。立勇敢之條。嚴退陣之誅。豁出邊之禁。命大帥以下。遠候迎敵。直夜斫其營。以驚之。使虜不得久牧境上矣。夫其人生長邊陲。嫻習戰陣。顧棄置在閑。而民壯越境防冬。計之左也。何不免山西民壯之班操者。徵其糧。每石八錢。解貯大同。無慮數萬。而以威遠屯丁舍餘。補其壯役。爲兩得之。自鐵器忌禁。商販遂絕。耕具缺焉。但不得出關耳。命如議行。給事吳世忠奏大同之墻緣長。

九百餘里。足爲久遠。尚有一簣之未成。何也。當于虛寧黑水水口三處。相其形勢。築大屯者三。如唐張仁愿築三受降城之比。掣腹裏卒。或三四千。妙選智勇之將。提之近地。久荒之腴。不下幾千萬頃。召民雜居。查徵其租。所當急也。上納之。十七年。迤北小王子使臣阿黑麻六千人。齎書求貢。而番文年月稱號不類。守仁以問。時已有入境者。請准十一年例。止令二千人入貢。乃連營邊外三四十里。遷延不至。時入掠墩中。指揮鄭瑀與火篩衆戰于焦山。殺傷相當。瑀被

虜支解之。而虜亦不得利而退。有旨選京兵二萬聽征。大學士健劉條上邊事。如所稱募土丁。厚馬價。發帑二十萬。赴邊置芻糗者。悉與僉謀焉。更舉張俊神英才勇。堪任。上深嘉納。正德元年。巡撫歐信奏大同各路十六城堡。歲徵倉屯四十二萬六千三百石。乃所用者至八十五萬一千三百餘。而客兵不與焉。雖有年例京運五萬。亦不足以補災傷減免之數矣。乞預處四十萬金。為召商費。部議寧兵駐天城。延兵駐清營。偏軍駐朔州。仍選京軍二萬以待。已虜連

月不退。各邊自為計。不得協。賊入掠平虜。并坪間。圍總兵葉椿。潘浩于黃嶺。巡撫高友璣告曰。官軍不滿三萬。勢在不敵。乞增調奇遊二兵。按伏而延。宣各守不發危矣。上命威寧侯越仇啓行。侍郎叢蘭報虜已次渾源。不聞諸將援者。下御史按之。大監孫清。巡按周倫。報虜已犯關。晉王知烝。馳虜入雁門。掠至五臺。繁峙。崞。忻。深入五百里。乃詔促鉞仇。鉞奏虜寇萬人來沙河。斬首三級。詔賞之以羊酒。議者謂鉞所亡失十倍。乃以捷蒙賞也。九年虜犯浮圖峪。營四

十里。詔副總張勇遊擊劉實馳之。時已蹂及寧定襄化矣。指揮陳經軍民死者相藉。巡按李穩劾奏太監孫清等。詔勘之。山西撫王珣又報虜急。十月治大同失機罪。十年三月寇繇滅胡日南圍馬邑。百戶姚鉞李寧死焉。總兵潘浩葉椿率裨將敵之于天城。乃退。五月分七路而入。一入股泉。一清墩。一鎮虜。一沙河。一碌砣。一滅胡。一沙溝。大掠七日。聞大同兵至。乃遁。殺虜以數萬計。巡按于鏊劾奏太監宋彬章忠王抬滿隆及撫臣高友璣裨將鄭恭谷琛任璽王祥

程鉞夏綱林寬劉暉等。上宥彬等。而逮葉椿。餘各降級。識者憂否臧之太弛也。兵部奏賊雖出境。其情叵測。朶顏頭田結親北虜。自前歲神周失利。去秋葉椿怯懼而叛。人王良李悅投入。誘出今之三關。已非昔比。宜遣大臣節制之。勅都督劉暉提三關。侍郎陳玉提東西路。都御陳天祥提外三關。各厲厥罰。陳天祥奏邊禁伐林。而未有墾山之禁。以故姦豪立莊闢路。改險爲夷。而給事黃鍾亦奏。渾源三關。四百餘里。舊爲禁山。蓋借茂林以資形勝。規利之徒。斬伐平

曠姦人淵藪。出沒乘便。于是併紫荆二關。悉申飭之。十二年。車駕幸陽和衛城。方獵。天雨冰雹。軍士有殞命者。是夜星隕。翌日幸大同。達賊萬衆聞之。向陽和轉掠應州。上命諸將擊之。虜尋退。勅封左都督江彬平虜伯許泰安邊伯賞其應州功也。冒之也。十三年秋。復幸大同。太監馬錫以故總兵葉椿宅獻。遂爲府第居焉。輕騎戎裝。風雪中行。駐蹕太原。冬還京。嘉靖元年。虜掠偏頭。遣侍郎臧鳳督軍事。二年。復改。勅以三邊內三關俱允節制之。晉撫胡定請馬

于太僕。而同撫張文錦議。同城之去陽和百二十里。中有聚落高山二站。僅供貢路之騷驛而已。乃按伏五百人之費。歷歲不貲。莫若永設千戶所者。二以蔚靈廣昌士卒編入之。于聚落以懷。渾源士卒編入于高山。各給百畝。聽與開荒。省客戍之冗。而免城倉之勞。長慮也。添枋溝于陽和之西。添樺溝于左衛之北。如中之驢圈。西之窯山。築堡實軍。繇近而遠。則水口宣迎黑山三堡。犄角之形成矣。越歲大帥桂勇請罷其役。三年八月。大同軍亂。殺巡撫僉都御史張文錦。

大同兵素曠悍。自江彬擅調。後益恣肆。先是元年七月。以糧餉弗給。聚衆譟噪。欲爲亂。提督侍郎臧鳳。巡按御史張欽。捕得惡首張昞。祥等。疏請置之。法兵部言。宣大糧餉久缺。近戶部會奏發運銀米。始到。查處未周。以致軍士爭呼。原情論罪。終當撫處。上特命法司會議。謂頃年主將因循。政多姑息。不及今重懲之。恐煽亂之風日熾。宜如鳳欽言。詔戮其爲首者五人。餘調極邊哨守。是歲築水口等五堡。遣卒二千五百家戍之。皆不樂往。文錦嚴令趨之。叅將賈鑑杖

其隊長。督之行。諸卒郭又柳忠等。遂倡亂。殺鑑。裂其屍。走嘯塞上。屯於焦山坡。文錦慮其勾虜。使副總兵時陳遊擊葉宗。招之還鎮。已管隊官關山等。廉得其首惡。欲捕之。諸卒恐。乃復糾集。焚大同府。入行都司。縱獄囚。攻圍錦文錦。聞變。踰墻走。匿宗室博野王所。叛卒擁衆圍王。索之急。王懼。出文錦。遂殺之。亦裂其屍。閉諸城門。焚鎮守總兵公署。出革任總兵朱振於獄。逼令爲主。振與約。勿犯宗室。勿掠倉庫。勿縱火殺。人。衆曰諾。卒稍戢脇。時陳爲奏乞宥。巡按御史王官

以事聞。上咎文錦撫馭失宜。激衆致變。命兵部左侍郎李昆宣勅。曲赦之。改宣府都御史李鐸。巡撫大同。陞都指揮桂勇代總兵。以宣府副總兵。靳英代時陳。各趨令速往。仍令團營內外官。選鋒聽征。該部預備糧餉。俱以密勅行事。鐸以憂去。以按察使蔡天祐代其任。時亂卒雖勉諾振。而悍不受約。天祐至。反覆開諭。桂勇擒捶五十餘人。暫解散。猶洶洶給事劉祺言。今日大同之變。繇前月處甘肅叛卒之少寬。法不可縱。恩不可濫。宜急命素有威望大臣。假之重權。

討除兇逆。以正國法。侍郎李昆至大同。因疏言。文錦志在立功。而以剛愎生變。彼之一身。誠不足惜。所可恨者。剛紀廢壞。爲國家恥。及今之計。惟在急罷羣情所不順者。以慰其心。勅新任鎮巡官。公忠協濟。而文錦骨髮暴露。妻子流離。乞加優卹。上俱下其疏。於所司。而命昆回部。時大同人心稍定。屬回虜犯甘肅。方遣尚書金獻民等西征。叛卒聞之。益自疑。十一月辛未。復相煽聚。殺大同知縣王文昌。城門晝閉。持兵嘯呼。代王浚杜都御史蔡天祐疏。請再降。明旨。

撫諭寬宥。迺諸叛卒稱亂狀。天祐疏不敢盡言也。代
王尋走宣府矣。兵部言大同反側迄今未定。不誅元
惡禍且日滋得。旨令會廷臣計處以聞。於是兵部
集廷臣議。言往者甘肅之變。姑息太過。人心習玩。叛
亂頻興。今若專爲撫處。則聲威損于九邊。暴禁難以
復振。宜選才望知兵大臣爲總制。率都督魯綱領營
兵三千。薊鎮精兵三千。并發宣府銳卒。進營近地。宣
勅曉諭鎮人。擒獻首惡。卽奏請班師。餘悉赦宥。不者
進勦無赦。戶部仍遣官齎銀軍前。厚懸賞格。城內親

王宗室及官吏士民固當前慮。第此寇不除。則羽翼
愈大。將遂不利于國家。况此寇顧戀妻子。或冀親王
宗室如前疏救。必不敢輕犯。遂舉戶部左侍郎胡瓚
總制。上從之。詔胡瓚督總宣大軍務。魯綱充總兵
官。調兵次大同近地。相機撫勦。先是勅原任鎮守太
監王覲及革任總兵江桓。時陳等密疏叛軍首惡姓名。
覲疏五人。桓陳疏八人。兵部言桓陳身在行間。所
見首宜真確。請勅瓚據名捕。卽行梟示。上然之。瓚
等以十二月辛巳發京師。御史王官言重兵壓境。人

心動搖。乞且留瓚聽其與鎮撫官密圖捕逆。而叛卒殺知縣王文昌事。官至是始言之。上責其奉事推延。且勅之曰。王官既欲定計捕逆。何不蚤奏。瓚等相機前進。王官協同贊決。毋得狐疑觀望。已而天祐疏言。總兵桂勇捕得猖亂軍士岳世美等五十四人。乞停止重兵。上責天祐阻撓。所捕名數與覲輩所疏不同。兵部乃言。朝廷命將出師。人心震懼。天祐等慮變生不測。故請寢兵以安其心。因集叛卒責以首報罪人姓名。叛卒詭以昔日行劫。扶死者具上。而覲寺

所報首惡。尚未檄諭該鎮。天祐故未知也。上命亟偵實以聞。是月都督桂勇千戶苗登王紳等奉瓚密檄。計擒郭鑑等十一名。揭示。勅旨斬首梟示。隨撫定五堡軍士矣。越二日堡軍郭巴子等復起拒城。殘勇家屬燬登紳等家。於是瓚請率兵臨境。設法擒獲。上切責天祐等。令戴罪擒賊自贖。仍令瓚暫駐宣府。俟事平召桂勇還。以朱振代之。四年正月天祐等擒首惡徐瓚等四人。瓚等遂班師。復疏列大同功狀。因盛言廷臣運籌協謀功。爲給事中鄭一鵬御史蕭

一中所劾。上責瓚班師不俟命。有功人員命候覈實。陞賞三月。天祐復捕獲首逆郭巴子等四名。助逆焦啞雲等三十四名。以事平聞。上命賞天祐等銀幣有差。郭巴子等梟示。文錦卹典。廷臣屢爲言之。上皆不許。江西都御史陳洪謨疏言。文錦邊圉重臣。致茲大患。誠宜加譴。以爲付託不效者之戒。第事在朝廷。雖誅夷之可也。若緣假手士卒。又從而懲。憑之傳之四方。羣小藉口。寢生陵替之階。其於紀綱所損。不小。乞加優卹。得嚴旨。夫以安慶孤城。獨抗方張。

之濠逆。而大同全盛地。不克蒐數卒也。文錦其如命何。五年。總帥朱振禦虜。頗有所獲。上獎諭之。七年。晉撫常道報虜入乾溝墩。號十萬。圍遊擊邵定軍。而各援不前。請設總制。兵部駁彈之。曰。賞罰明。然後軍政舉。頃者。各邊債轅之徒。多獲僥倖。而被害官軍。反坐其咎。功罪旣混。人心懈弛。卽有制府將焉用之。宜勅給事臺臣。往勘總兵趙康等。輕重以聞。上荅可。頃虜復寇天城。及于雲朔。指揮趙源戰死之。八年。山西都御史劉大謨言。正統時。發山西郡邑民壯二萬。

全邊明言
餘詣戍三關。設通判二。部署之。至今足賴。御史議革。彼所謂千夫長者。特比肩能約束之哉。不如稍寬其班。爲四。一當戍。二守本郡。邑城三四。放歸農作。在戍者。給行糧四斗五升。復其家。二人。部覆如議。惟裁其部署者一員。九年。虜將有警。西撫張翰乞兵。延撫李如圭同撫王大用。各持不發。部疏曰。諸臣互推交避。三關則託咎于同援。雲中則委稱于套渡。具文飾說。動輒千言。匪恭匪和。孰大于是。宜諭非逢至急。不得擅徵虜至如期。豈容觀望。上詔誤者逮繫。惟重無

赦。遣黃門張潤身往勸應朔之虜。已而潤身奏報。按臣張祿所上首功。果爲奇捷。歷叙勞伐。于是兵部駁之曰。方虜來時。溺者情者。失印者棄。泣願降者。計不出此。而徐勛殺降于應州。彭樸翟江逗遛不進。若復雷同附和。豈有戰伐之效哉。上是之。別遣焉。噫。斯時大司馬猶能抗論言路之隱。亦行古之道也。御史徐汝圭言。北虜有三窟焉。河套。威寧海子。北口青山。是也。禦之莫先兵食。以食言之。延綏則宜漕石州。保德之粟。自黃河而上。楚粟繇鄖陽。汴粟繇漢中。以達

於陝宣大則宜二麥將登多入糴置及轉糴於山西
山東河南三邊則西運易南運軍城北運居庸以爲
紫荊倒馬白羊等口之備皆當招商賃車給食于官
以兵言之西路萬全右衛懷安衛與天城陽和相近
宣府遊兵宜駐此以爲大同之援南路順聖西城與
陽和相近宜選補于此以爲臨期之援東路永寧等
處則護衛宣府以爲調遣之援北直隸八府責命召
募勇敢設法練習以爲邊關遠近之援榆林山陝遊
兵各於本處分投遥制如此則糧有餘備兵有餘力

一旦有警從容調發不至如曩日之恇擾矣疏入採
納施行十二年總兵李瑾議于天城孤店浚豪四十
里用遏虜衝克日授工馭于苛衆益騰怨十月六日
三更亂卒王福勝等譟焚帥府攻瑾殺之代王聞變
奔宣府之西城巡撫潘倣初蒞事倉猝不知所爲兵
書王憲曰同兵未必悉變驕卒戕帥迫脇宗藩此而
失誅天討安在據報五六十輩則宜榜諭安良善而
貸脇從盡捕渠魁責以守臣相機從事上以西官
廳都督魯綱代瑾促之行倣數上疏爲亂卒丐命給

諫劾倣落其職以參政樊繼祖代之。宣大督劉源清。總兵卻永討亂至陽和。榜示令其解散。內有五堡之變。處之太寬等語。五堡遺孽偶語不自安。謂且追理甲申事也。大同士大夫耆老皆來請駐兵解甲。單騎撫之。源清疑不許。已而舊撫潘倣付帥趙鎮僉事孫允中。郎中詹榮。械繫王寶等六十餘人。杖死十餘人。檻致軍門。請旋師。徐圖之。可盡逆。但勿言五堡事。源清曰。甲申之役。胡公以兵不臨城。譏彈紛至。吾不蹈前轍矣。以其囚屬按院考掠。因遮及舊總兵朱振失。

職。怨望首亂。源清乃遣趙綱大捕城中。所捕多從征有功者。爲囚誣。比晚城中訛起。曰屠城屠城。遂大呼爲亂。殺千戶張欽。孫允中撫之稍定。源清爲書召振。疑其不來。請錦衣奉駕帖逮之。振實不反。詣幕府自明。囚言黨亂情。旦夕可盡。毋煩兵。不許。振發憤自刎。明日大兵至城下。大肆殺掠。橫屍枕藉。亂兵開門迎戰。殺遊擊曹安等數十人。官軍亦攻四關。廂據之城。中亂黨益發。庫兵出罪弁黃鎮馬昇楊麟于獄。擁以爲將。卻永塞城門。引水灌之。倣與俊。欽六將軍出見。

全通略言
永祈緩兵。永不聽。且揚言大同奉一王子。召虜南襲金陵耳。源清乃多邏卒。過城中。諸章疏而趣請益師五萬以勦之。且曰：衣冠之族悉從叛矣。本兵憲以爲然。始選京軍啓行。是時上悟大同小變不足煩朝廷。遣將其各官可無往。數日潘倣報變已定。如班師而過已。而源清永貪功妄殺。激變源清亦詆倣媚賊。取憐。殆非人類。廷議多助清。獨禮侍顧鼎臣黃綰曰：用兵非其時也。虜入至大同教場北。官軍擊退之。城中叛卒出應虜。官軍捕斬百餘。復嬰城固守。卻永督

諸路兵。據四關。廂圍之。城中樵採路絕。公廨私舍焚撤已多。復有虜至。叛卒引入城。指代府曰：奉此爲那顏居。宴虜于東城門。滿城皆巷哭。明日我兵殊死戰。虜驅叛卒爲先鋒。大半死。虜知不足賴也。大詬而去。源清豎旗招其降。叛卒裂之。百道攻城。死者無數。源清告急。請調九邊兵爲禦虜計。上不許。乃諭閣臣言。夏等曰：朕在病中。未嘗不以大同爲懷。謀殺主將。原非舉城所爲。卻永無謀。源清嗜殺。使其劫囚勾虜。拒逆朝廷。旣說脇從不問。乃又攻城灌水。玉石不得。

而分也。宣大爲北門鎖鑰。皆不可壞。人而無臂。何以自衛。此地人民。皆我祖宗所遺。源清必欲城破人誅。忠乎。否乎。縱幸成功。何繇興復。可罷去二臣。掣還諸路。于是源清自劾求退。上奪職閑住。以侍郎張瓚代之。諸叛卒。虞士民有變。乃排根先後所與。粗悟者。闖室戕之人。情繇是乖。刺餉司詹榮。有機略。密與揮使紀振。戴濂。王寧。軟血討賊。寧故出城持士庶狀。詣制臺前。及撫院樊繼祖。所定計曰。馬昇。楊麟。爲叛所迫。非其本心。誠貸昇死。令討逆。自效。可立靖矣。計

定。卽以二千金付昇。會張瓚遣副帥梁震。主事楚書。齎德音告城中。歡聲雷動。其夕。昇麟遂屬黃鎮等九人。斬之。次日。繼祖單車至。令從兵退二舍。以俟。昇麟復先後斬首惡許章。二十六輩。餘無所問。道殫相望。發粟賑之。自是大定。諸路悉罷。侍郎黃綰至大同。絕不問叛軍事。邪心稍安。有闕鉞薛源。揚月者。爲叛卒使虜。至是鉞歸。綰執而付之法。反側子藉有流言。綰大集諭。以福禍流言亦輯。顧有請招源月。不應。留虜中者。綰曰。此輩悉庸奴。虜所牛馬役之者。下令逆卒

自虜歸者。邊吏執戮之。不來則勿索。時叛卒方挾虜
恐喝內地。至叱啐墩卒。要中國招已。聞縮令大沮。百
姓知縮足恃。凡前後罹叛卒害者。始麇至投牒。縮佯
不應。而密以他捕之。若干人。乃又出漏惡郭經數名。
榜示之。城中訢訢。知不誑矣。縮疏言大同所以屢變
者。始于情罪不明。終于積疑不解。王用三驅。寧失前
禽。既正典刑矣。戒有司無貪功。無急追。聽其自逃。而
執其不獲脫者。但使不潛城爲害。則善矣。或恐其急
而走虜爲憂。是不知彼已者也。虜得漢人。率奴隸之。

于團營調征。繼而報虜差緩。請停前發。上疑之。曰
近數聞虜入。不言去。其地方殘逞。寂無聞也。必撫按
互欺。其遣官覈勘。給事錢薇疏曰。承平日久。綱紀多
弛。諸將平居。苦文法之束縛。而以逢迎爲悅。臨敵希
國典之寬大。而有苟免之心。是在本兵撫臣。作養砥
礪之耳。戰功多賴家兵。而蓄家兵。必繇私積。正統間
都御史羅亨信。督屯大同。令將官得率其家丁。自耕
邊地。而不責其課。夫官耕則民賴其衛。咸盡力于南
畝。一也。官能自給。可免侵漁。二也。將取利于邊。重去

其地寇至戰氣自倍。三也。久居不徙。周知阨塞。可以接伏策。應四也。自後撫臣懲鎮將役軍之多。而奏革之。其敝遂至于官民竝廢。耕獲虜得以經年屯聚。其地匱餉資敵。殊爲失計。臣以爲復將。臣自耕之舊便。俱得。旨。十六年虜牛心山之役。總兵梁震遇數千騎于宣寧灣。斬九十六級。復破之于紅崖。斬八級。周叙以聞。虜復從偏關入。悉發保定漢達軍勒之。高山聚落堡旣成。頗扼虜。上曰。自張文錦修堡致變。率相視爲戒。樊繼祖改立二所有。裨邊防。其蔭一子。西

不則。易馬遠夷耳。使虜果雄桀。得此百輩。奚益。虜性得利則趨。遭創則避。固非此輩能使之去來也。今若招之來。貸之則失刑。殺之則害信。反使彼得恃通南之勢。以挾制上下。非計之得者也。臣竊謂今日安攘之要。莫先自治。吏此土者。公平廉潔。飭法詳刑。勞來安集。其未獲餘惡。聽其自逃。而徐捕之。則地保無虞矣。縮隨具叛獄詞以聞。凡甲甲辭及戕李瑾。逋誅者。殺曹安景銓。六七十家者。王福勝等十四人。服上刑。張玉等十九人。辟血奴兒四十人。戍。悉如議。頃樊繼

祖亦令謀者捕楊月于虜中誅之。繼祖乃奏大同會未十年動。遭兩變中鹽失利。田無蓄畲。武宗巡幸兩經。扈從至數十萬。搜括之苦。殆盡雞豚。災傷相繼。蕭條已極。上覽其奏。下計部議給賑恤。毋執故帑。戶部覆報歲給七十七萬有奇。而外解又復數萬。撫臣不能調度盈虛。慎重出納。今按所上儲冊。舛錯參差。日增月盛。竊恐太倉之蓄不足供此。安論九邊也。繼祖所築高山聚落二堡告成。乃合新舊遊奇兵。令遊擊尹堂趙綱分統之。總督周叙始報虜至井坪。請

撫韓邦奇言。老營堡之孤縣也。設遊徵關。番戍其地。人無固志。請募土著常居聽發。而班軍遣歸。兼得行月二糧費。部覆其便。因立千戶所一。總督毛伯溫上言。剏堡募軍。立為三千統之。以六弁孫麟等耕其棄地者。可大也。得旨。近邊內外可耕之地。悉給軍開墾。永不起科。母為有力者奪。十九年虜入廟灣。指揮周岐等陷其伏中而沒已。又走朔州交汾等。上念虜頻頻。其令兵部會官議。部乃奏增置士馬數。寧武增六千人。老營增一將。平虜亦增一將。西撫陳講更

議曰。往者遠。城東勝。則三關其內區也。茲者關以外。夷實逼處此。而士馬之額仍舊。請以山西之兵守大。同之障。則老營之界東長。峪者宜遣六千戍之。中路。寧武莫要于神池。而利民副之。西路偏頭莫要于老。營。而八角副之。東路雁門莫要于北樓口。宜設叅戎。二各軍三千人。守戎二各千五百人。自陽方至野。額。而神池百二十里。乃壯自野。額至黃河。而老營三百。里。乃壯更增五百人。北樓間而東路十八隘。四百。里。乃壯馬資于罔寺。餉資于代州商稅馬。悉計可二十。


年秋。俺荅阿不孩遣夷使肯切石天爵。款大同陽和。塞求貢。言其父認阿郎在。先朝常稽顙蒙賞。且許。市易。近以貢道不通。歲掠多災。卜之神云。貢吉果許。貢當令邊民墾田。塞中夷衆牧馬。塞外飲血不犯。否。則徙帳北。而縱精騎南掠云。同撫史道言。虜絕貢四。十年。歲苦侵暴。今款誠中國之利也。時虜待邊外。屢。向墩哨卒。調進止。一日邀守墩百戶李實。以虜酒席。地飲之。載以馬。擁入俺荅營。與之飲宴。有掠哨卒衣。糧者。俺酋痛懲之。以原掠物還。于是巡按譚學奏請。

速定大計。其詭秘之情難信。而恭順之迹有徵。准貢則後患當防。勿准則近害立至。詔兵部集議曰。詐而貢不可信。大義拒之。彼姦自阻。趣行守臣。大振天聲。方爲得策。乃遣尚書樊繼祖往督軍。定賞格。能斬俺酋者五百金。陞三級。虜以貢事不諧。三道竝入。盡蹂秋稼。乃詔延綏副帥王縉屯黃甫川。保定副帥屯紫荆。前後發京營六千人。任鳳領之。二千人趙卿往真保領之。西撫陳講塘報俺荅阿不孩從白泉下石嶺徑趨太原。吉囊繇平虜掠平定。總兵丁瑋遊擊

周宇死之。逼于真定。更遣原任都御翟鵬往禦之。陳講報大同遊戴昇承調逗遛。而壯夫劉文明等乃能奮斬虜首六十四級。生擒十人。獲謀者二十輩。功出官兵上。宜重治昇而顯錄文明等。然虜所屠戮五萬二千餘。樊繼祖乃報斬級前後四捷。首功五百二十餘級。上嘉其連捷。而臺省龍遂傳鎮駁奏。繼祖盛張其伐。乃與譚學所報刺謬。何也。一日從容出關。再曰虜回未戰。同時發疏。矛盾若此。史道之玩寇。王陞之避難。皆當問。勅紀功官張翼奏復曰。先于八月

阿不孩深入。焚掠慘怛。井烟不舉。陛下切責諸將。非不嚴也。諸將湯然聽其徜徉而去。未數日。吉囊復至。時繼祖駐師大同路。將咸會。若能合力。亦得志矣。畏之如虎。避其長驅。寧與嵐汾再遭屠剝。雲集無籌。節制安在。樊繼祖陳講各禱職。王陞等各降級。逮問之。紀功官以稽緩賜罷。尋遣侍郎張漢往賑郡邑之被虜苦者。翟鵬奏乞別選壯丁。名曰義勇。爲三關振上獨斷之。曰。近者三關失守。止賴民壯。各處災傷。豈宜騷動舊役。民兵暫止之。其稽舊制。經畫長策。而

部議掣西人之戍同者。撥河南之戍班者。募土著之充遊兵者。三關之急在帑。宣大之急在粟。乞空運通州倉米給宣大。而發帑二十萬以濟山西。從之。是時掌本兵者張瓚。巧附內援。屢被譏劾。上責之曰。虜兩入太原。不聞敵邊。邊吏罪不可追。樞本亦難謝愆。所議預集兵馬十枝。瓚欲遣翟鵬亦請遣。上皆不允。復切責大司農李如圭。以其邊人乞帑者動數百萬。更無別籌。圭等徒徇人言。不行覈實。兩部各陳所罪。釋之。去歲欵議不諧。時都撫史道乃留其真夷肯



切而遣石天爵先還。貽以布帛。虜亦以馬報之。故大掠三關而大同無恙。議者指道媚虜嫁禍。道遂得罪。三月虜送中國人李山至。請易肯切。廷議以爲詐。不之許。閏五月俺荅復遣石天爵滿受禿滿客漢。卽肯切子。邊人不敢納。以告巡撫龍大有。大有遂掩以爲功。猥言以計擒之。縛天爵而殺受禿等。部議吳天爵者華民甘虜。塗炭震驚。茲憑故智叩關。而邊臣應機剪其羽翼。足寒其膽。厥功甚大。詔優陞大有文武將吏。磔天爵肯切于市。蓋小王子九部牧于青

